



**Uunga siunnersuut: Utoqqalinersiaqarneq pillugu Inatsisartut inatsisaata allanngortinneqarnissaa pillugu Inatsisartut inatsisissaattut siunnersuut, aamma siusinaartumik pensionisiat pillugit Inatsisartut inatsisaata allanngortinneqarnissaanut siunnersuut (Utoqqalinersiaqartunut utoqqalinersiat toqqammaviusut qaffanneqarneri, utoqqalinersiat qaffasinnerpaat qaffanneqarneri aamma ilanngaassinnginnermi aningaasat tigummiinnagassat qaffanneqarneri)**  
(Isumaginninnermut, Suliffeqarnermut Nunamullu Namminermt Naalakkersuisoq)  
(Siullermeerneqarnera)

Uuminnga siunnersuuteqarnikkut pisortanit utoqqalinersiutit kisimiittunut aappariinnullu ukiumut 9.000 koruuninik qaffassapput. Siusinaartumik pensionisiat qaffasinnerpaaq ukiumut 5.660 koruuninik qaffassaaq.

Demokraatit soorunami nuannaarutigaat, utoqqalinersiutillit siusinaartumillu pensionisiallit inissaminiilluinnartumik isertitaminnik qaffaaffigineqalermata. Pissusissamisuuinnarpoq, uagut inuiaqatigiittut pensionisiallit sapinngisamik inuuniarnikkut pitsaanerpaamik atugaqartissagigut. Taamaattumik una siunnersuut pingaartuuvog.

Qaffaassulli annertugisassaangilaq, maannakkut akit taama qaffakkiartortigisinerat isiginiaraanni, ilaatigut Ukraine-mi sorsunneq peqqutaalluni aammalu nunarsuaq tamakkerlugu ikummatissamik ajornartorneq. Imaaleriaannaavog sukkasuumik, akit qaffaataasa qaffaataagaluartog nungussagaat. Taamaattumik Naalakkersuisut apererusuppakka, ajornartorsiummut tassunga qanog isumaqarpat iliuuseqarniarlutillu?

Taassuma saniatigut pakatsinarpoq paaseqqillugu, Naalakkersuit tamaat isigalugu inatsisiliornerminni qanog angusaqarluarusunnigtsigalutillu peqqissaanngitsigisut. Piffissami sivikitsumi takuarput, Naalakkersuisut Mittarfeqarfiit pillugit siunnersuut aammalu napparsimasut naammagittaalliorsinnaanerannut taarsiiffigitissinnaanerannullu siunnersuutit tunuartinneqartut. Ajorluartumik tamakku takutippaat, Naalakkersuisut tungaanniit suliat peqqissaartumik suliarineqarsimangitsut, taamaasillutillu aaliangigassat pingaartut kinguarsarlugit. Tamanna pitsaanngilluinnarpoq.

Taamatutaaq una siunnersuut taamatut ingerlanneqarpoq, amigateqartorujussuulluni, Demokraatinit naatsorsuutigisatsinniit.

Siunnersuutillu uuma aamma ajornartorsiut una aqqinngilaa, utoqqalinersiallit ineqarnermi tapisiaminnik (boligsikringiminnik) allanillu tapiissutisiassaraluannik appaaffigineqariataarsinnaanerat toqqammaviusup qaffanneqarneratigut. Kingunerissammagumi, utoqqalinersiat toqqammaviusumik qaffanneqarnerisa iluaqutaanngilluinnarneri.



Siunnersuutip aamma illuatungeriit pilersueqatigiinnissaannut ajornartorsiut aqqinngilaa. Naak taanna annertuumik kissaatigineqaraluartoq partiinit amerlanerpaanit kingullermik qineqqusaartoqarmat, tamannami Naalakkersuisunit pingaartinneqarsimarpasinngimmat. Utoqqalinersiallit nersunaqaat, Naalakkersuisullu kanngusunnginnerlutik taamaalioramik. Taamaattumik Demokraatit ataatsimiititaliaq kajumissaassavaat aqqiissutissamik suliniuteqaqqullugit, illugiimmik pilersuisussaataanerup piviusumik tunngavillip peernissaanut.

Erngerluta suliassaq pitsaasumik suliaritigu Naalakkersuisut tungaanniit nipangiinnarluta pipallatamik suliaat isiginnaaginnarnagu.

Demokraatit partiinut allanut suleqateqarnissaminut piareersimapput qineqqusaarnermi ataatsimoorussamik neriorsuut illugiimmik pilersuisussaataanerup peernissaa inuttut ataasiakkaatut kiffaanggissuseq ataqqinassuserlu qaffassarniarlugu. Tamassuma tusaaneqarnissaa neriuutigaarput pissutigalugu, Naalakkersuisut manna takutereermassuk suliassaq taanna pingaarnersiorsimangikkaat.

Aamma oqartariaqarpunga, una pisortat aningaasartuutaannik piujuartussamik qaffaataammaanaasit, tamannalu ajornartorsiutinngorsinnaalluni, tassami Naalakkersuisoqartugut eqqarsarluaqqaanngiivillutik iliuuseqartartunik, aningaasanik aamma isertitaqartariaqarnerput eqqarsaatigalugu. Maannamut Naalakkersuisut nunarput piitsunngoraluttuinnartippaat aningaasarsiornissatsinnullu periarfissagut annikillisarlugit. Tamanna silatusaarnerorpasinngilaq.

Takunngitsuugaqarsimasinnaavungali Naalakkersuisut tungaanniit suliniutinik, nunatsinnut pisuujunerulersitsinnaasunik. Taamaattumik siumut inernileereernanga Naalakkersuisut aperissavakka, suliniutit suut pilersaarutigineraat pisortat aningaasartuutaannut apparsaataasinnaasunik imaluunniit namminersortut isertitaannik qaffassaataasinnaasut?

Taamatut oqaaseqarlunga Ilaqutariinnermut- Peqqissutsimullu ataatsimiititaliaq kajumissaassavara Naalakkersuisut pipallatamik suliaat aqqinniarsareqqullugit imaasillugu, utoqqalinersiuteqartortagut siusinaartumillu pensioneqartortagut pissusissamisoortumik isertitai qaffaavigineqarniassammata taamatullu, illugiimmik pilersuisussaataanerup atorunnaarsinneqarnissaa isumageqqullugu.

Siunnersuut Ilaqutariinnermut- Peqqissutsimullu ataatsimiititaliamut suliareqqitassanngorlugu innersuupparput.